




Señora Annelien
Tromp-Díaz
**"Ban pensa hunto
kico nos por haci
hunto pa haci
Aruba mihor"**



ORANJESTAD (AAN): Durante e inauguracion di e pier na Savaneta siman pasa diahuebs, grupo di padvinderij Jeanne d'Arc di Savaneta tabata presente acompaña pa nan lider di grupo Señora Annelien Tromp-Díaz cu ta un di e personanan cu a tuma e iniciativa pa manda carta y boga pa e pier aki haya atencion.

Manera Señora Tromp-Díaz ta splica, e 'pier di Brisas' ta un icono den Savaneta y ta mira e importancia cu e pier aki tin pa tur Savanetero. E pier aki ta conoci pa generacion tras di generacion y tabata lastima pa mira e pier destrui. Pa e motibo di e biganan frustia hopi hende no tabata haci uso di e pier mas pasobra e tabata peligroso. E pier di Savaneta completamente nobo y accesibel pa uso di comunidad henter, muy en especial esun di Savaneta ta lanta e calidad di e barío.

E finalizacion di e prome fase di e pier di Savaneta ta brinda un sin fin di posibilidadnan positivo pa recreacion di e barío aki. Manera cu Señora Annelien a indica cu e pier aki ta demostra cu nos comunidad no mester cay den decadencia pero mester sigui bay dilanti. Lo mas importante ta pa cuida e pier pa asina tur hende por disfruta di dje mes un cos.

Como un lider di un grupo hubenil Señora Tromp-Díaz a duna di conoce cu e ta haya e iniciativa di Minister Otmar Oduber pa sigui cu un di dos fase, cu lo ta e area recreativo, lo duna Savaneta algo mas pa brinda e famia y comunidad di Aruba henter.

Manera Señora Tromp-Díaz ta splica, nos mester traha hunto pa haci Aruba mihor, enbes di sinta critica y warda algo pasa. Nos tur mester monitoria nos barío pa asina yuda alerta Gobierno pa loke falta, pa asina hunto nos por yuda drecha y beneficia di e cambionan positivo cu ta tuma lugar.